

現代生活藝術系列

華嚴經疏論纂要

107

— 入法界品 之十

華藏淨宗學會印贈

大方廣佛華嚴經疏論纂要卷第一百之七

五臺山清涼國師澄觀疏鈔

太原方山長者李通玄論

閩鼓山私淑比丘道需纂要

入法界品第三十九 之十

○自下大文第五有十善友寄十地位。即分十段。

婆珊婆演底夜神。寄歡喜地。鈔寄初歡喜地者。初獲聖

性具證二空能益自他。生大喜故。城名迦毘羅者。此云黃色。往

昔黃頭仙人依此處故。黃是中色。表契中道故。

又此是佛生之城。表初地生佛家故。婆珊者。此

云春也。婆演底者。此云王當。以於春時王當苗稼故。謂顯初入地。能生長萬行。護衆生故。地上多見夜神者。證智玄妙。離相破闇故。下九天神。準梵本。皆是女神。瞿波亦女者。地上證於同體。慈悲女之狀故。第一依教趣求。

爾時善財童子。一心思惟安住神教。憶持菩薩不可沮壞智藏。解脫修其三昧。學其軌則。觀其遊戲。入其微妙。得其智慧。達其平等。知其無邊。測其甚深。漸次遊行。至於彼城。從東門入。佇立未久。便見日沒。心念隨順諸菩薩教。渴仰欲見彼王夜神。於善知識生如

來想復作是念。由善知識得周徧眼。普能明見十方境界。由善知識得廣大解。普能了達一切所緣。由善知識得三昧眼。普能觀察一切法門。由善知識得智慧眼。普能明照十方刹海。

〔疏〕於中先依前修證。後漸次下。趣求後友。於中先至時處。從東門入者。開明之初。顯入證之始故。見日沒者。是夜神故。表分別見日。皆已亡故。後心念下。生渴仰心。鈔表分別見日皆亡者。初地斷見惑。卽分別煩惱故。

○第二明見敬諮問

作是念時。見彼夜神。於虛空中。處寶樓閣香蓮華藏。

師子之座。身真金色。目髮紺青。形貌端嚴。見者歡喜。衆寶瓔珞。以爲嚴飾。身服朱衣。首戴梵冠。一切星宿。炳然在體。於其身上。一一毛孔。皆現化度無量無數。惡道衆生。令其免離險難之像。是諸衆生。或生人中。或生天上。或有趣向二乘菩提。或有修行一切智道。入彼一一諸毛孔中。示現種種教化方便。或爲現身。或爲說法。或爲示現聲聞乘道。或爲示現獨覺乘道。或爲示現諸菩薩行。菩薩勇猛菩薩三昧菩薩自在。菩薩住處菩薩觀察。菩薩師子嚙申。菩薩解脫遊戲。如是種種成熟衆生。善財童子見聞此已。心大歡喜。

以身投地禮夜神足。繞無數帀。於前合掌而作是言。
聖者。我已先發阿耨多羅三藐三菩提心。我心冀望。
依善知識。獲諸如來功德法藏。唯願示我一切智道。
我行於中。至十力地。

〔疏〕於中二。初見友依正於空見者。城表教道。空表
證道。宗說兼通。如日處空故。服朱衣者。證智明顯
故。法門星像。不離一身如體。化生作用。不離一毛
之性。二善財童子見聞下。設敬諮問。鈔宗說兼通者。前已引竟。
即楞伽意。故彼第三經云。佛告大慧。二世如來有
二種法。通謂說通。及自宗通。說通者。謂隨衆生心
之所應。為說種種契經。是名說通。自宗通者。謂修
行者。離自心現種種妄想。謂不憶一異俱不俱品。

超度一切心意意識。自覺聖境離因成故。一切外道聲聞緣覺。二邊者。所不能知。我說是名。自宗法通。釋曰。謂初了唯心。謂不墮下境界。則滅超度一切下。能取亦無。自覺聖下。正悟自心。不由他悟。離三量成。故離因成。一切外道下。對他顯勝。經結勸云。是名自宗通。及說通相。汝及餘菩薩摩訶薩。應當修學。偈云。謂我二種通。宗通及言說。說者授童蒙。宗爲修行者。

○第三稱讚授法中二。初稱讚後善男子我得下。授已法界於中三。一標名體。二顯業用。三得法

久近今初

時彼夜神告善財言。善哉善哉善男子。汝能深心敬善知識。樂聞其語。修行其教。以修行故。決定當得阿耨多羅三藐三菩提。善男子。我得菩薩破一切衆生

癡暗法光明解脫

〔疏〕一切衆生癡暗者。卽所破二愚。法光明者。卽是能破二無我智。又破衆生暗爲悲。法光明是智。悲

智具故。

其二愚二無我等。並如地品。

○二明業用中二。先長行。後偈頌。今初

善男子。我於惡慧衆生起大慈心。於不善業衆生起大悲心。於作善業衆生起於喜心。於善惡二行衆生起不二心。於雜染衆生起令生清淨心。於邪道衆生起令生正行心。於劣解衆生起令興大解心。於樂生死衆生起令捨輪轉心。於住二乘道衆生起令住一

切智心。善男子。我以得此解脫故。常與如是心。其相應。善男子。我於夜闍人靜。鬼神盜賊諸惡衆生所遊行時。密雲重霧。惡風暴雨。日月星宿。並皆昏蔽不見。色時。見諸衆生。若入於海。若行於陸。山林曠野諸險難處。或遭盜賊。或乏資糧。或迷惑方隅。或忘失道路。悵惶憂怖。不能自出。我時卽以種種方便而救濟之。爲海難者。示作船師。魚王。馬王。龜王。象王。阿脩羅王。及以海神。爲彼衆生止惡風雨。息大波浪。引其道路。示其洲岸。令免怖畏。悉得安隱。復作是念。以此善根。迴施衆生。願令捨離一切諸苦。爲在陸地一切衆生。

於夜闇中遭恐怖者。現作日月及諸星宿。晨霞夕電。種種光明。或作屋宅。或爲人衆。令其得免恐怖之厄。復作是念。以此善根迴施衆生。悉令除滅諸煩惱闇。一切衆生有惜壽命。有愛名聞。有貪財寶。有重官位。有著男女。有戀妻妾。未稱所求。多生憂怖。我皆救濟。令其離苦。爲行山險而留難者。爲作善神現形親近。爲作好鳥發音慰悅。爲作靈藥舒光照耀。示其果樹。示其泉井。示正直道。示平坦地。令其免離一切憂厄。爲行曠野稠林險道。藤蘿所罣雲霧所闇而恐怖者。示其正道。令得出離。作是念言。願一切衆生伐見稠

林。截愛羅網。出生死野。滅煩惱闇。入一切智平坦正道。到無畏處。畢竟安樂。善男子。若有衆生樂著國土而憂苦者。我以方便令生厭離。作是念言。願一切衆生不著諸蘊。住一切佛薩婆若境。善男子。若有衆生樂著聚落。貪愛宅舍。常處黑闇。受諸苦者。我爲說法。令生厭離。令法滿足。令依法住。作是念言。願一切衆生悉不貪樂。六處聚落。速得出離生死境界。究竟安住一切智城。善男子。若有衆生行闇夜中。迷惑十方。於平坦路。生險難想。於險難道。起平坦想。以高爲下。以下爲高。其心迷惑。生大苦惱。我以方便。舒光照及。

若欲出者。示其門戶。若欲行者。示其道路。欲度溝洫。示其橋梁。欲涉河海。與其船筏。樂觀方者。示其險易。安危之處。欲休息者。示其城邑。水樹之所。作是念言。如我於此。照除夜闇。令諸世事。悉得宜敘。願我普於一切衆生。生死長夜。無明闇處。以智慧光。普皆照了。是諸衆生。無有智眼。想心見倒之所覆翳。無常常想。無樂樂想。無我我想。不淨淨想。堅固執著。我人衆生。蘊界處法。迷惑因果。不識善惡。殺害衆生。乃至邪見。不孝父母。不敬沙門。及婆羅門。不知惡人。不識善人。貪著惡事。安住邪法。毀謗如來。壞正法輪。於諸菩薩。

些辱傷害。輕大乘道。斷菩提心。於有恩人。反加殺害。於無恩處。常懷冤結。毀謗賢聖。親近惡伴。盜塔寺物。作五逆罪。不久當墮三惡道處。願我速以大智光明。破彼衆生無明黑闇。令其疾發阿耨多羅三藐三菩提心。既發心已。示普賢乘。開十力道。亦示如來法王境界。亦示諸佛一切智城。諸佛所行。諸佛自在。諸佛成就。諸佛總持。一切諸佛共同一身。一切諸佛平等之處。令其安住善男子。一切衆生。或病所纏。或老所侵。或苦貧窮。或遭禍難。或犯王法。臨當被刑。無所依怙。生大怖畏。我皆救濟。使得安隱。復作是念。願我以

法普攝衆生。令其解脫一切煩惱。生老病死憂悲苦
患。近善知識。常行法施。勤行善業。速得如來清淨法
身。住於究竟無變易處。善男子。一切衆生入見稠林。
住於邪道。於諸境界起邪分別。常行不善。身語意業。
妄作種種諸邪苦行。於非正覺。生正覺想。於正覺所。
非正覺想。爲惡知識之所攝受。以起惡見。將墮惡道。
我以種種諸方便門。而爲救護。令住正見。生人天中。
復作是念。如我救此將墮惡道諸衆生等。願我普救。
一切衆生。悉令解脫。一切諸苦。住波羅蜜出世聖道。
於一切智。得不退轉。具普賢願。近一切智。而不捨離。

諸菩薩行常勤教化一切衆生

〔疏〕於中二。先興救物之心。二我於夜暗下。正明對緣救攝。於中十門。初一總明。爲海難下別顯。今初有四種。一夜等爲救時。二海等爲救處。三遭盜等爲所救。四種種方便爲能救。後九門別顯中。文皆有二。先救世苦。令得世樂。後以迴向大願。令其究竟離苦得樂。九中一救海難衆生。二爲在陸地下。救處陸衆生。三一切衆生下。救求不得及行山險衆生。四救樂國土衆生。五救著聚落衆生。六救暗夜衆生。七是諸衆生無有智下。救惑業衆生。八或

病所纏下。救八苦衆生。九入見稠林下。救惡見衆生。

○二偈頌

爾時婆珊婆演底主夜神。欲重宣此解脫義。承佛神力。觀察十方。爲善財童子而說頌曰

我此解脫門 生淨法光明 能破愚癡闇

待時而演說 我昔無邊劫 勤行廣大慈

普覆諸世間 佛子應修學 寂靜大悲海

出生三世佛 能滅衆生苦 汝應入此門

能生世間樂 亦生出世樂 令我心歡喜

汝應入此門	既捨有爲患	亦遠聲聞果
淨修諸佛力	汝應入此門	我目甚清淨
普見十方刹	亦見其中佛	菩提樹下坐
相好莊嚴身	無量衆圍繞	一一毛孔內
種種光明出	見諸羣生類	死此而生彼
輪迴五趣中	常受無量苦	我耳甚清淨
聽之無不及	一切語言海	悉聞能憶持
諸佛轉法輪	其聲妙無比	所有諸文字
悉皆能憶持	我鼻甚清淨	於法無所礙
一切皆自在	汝應入此門	我舌甚廣大

淨好能言說	隨應演妙法	汝應入此門
我身甚清淨	三世等如如	隨諸衆生心
一切悉皆現	我心淨無礙	如空含萬象
普念諸如來	而亦不分別	了知無量刹
一切諸心海	諸根及欲樂	而亦不分別
我以大神通	震動無量刹	其身悉徧往
調彼難調衆	我福甚廣大	如空無有盡
供養諸如來	饒益一切衆	我智廣清淨
了知諸法海	除滅衆生惑	汝應入此門
我知三世佛	及以一切法	亦了彼方便

此門徧無等 一一塵中見 三世一切剎

亦見彼諸佛 此是普門力 十方剎塵內

悉見盧舍那 菩提樹下坐 成道演妙法

疏偈頌中。二十一頌分四。初一頌法門名體。二有四頌。舉因勸修。卽四無量。三有十頌。顯果令人。卽六處殊勝。四有六頌。明業用廣大。

○三得法久近中。先與二問。後還兩答。答中有二。先答發心時誦。後答得法久近。今初。

爾時善財童子。白夜神言。汝發阿耨多羅三藐三菩提心。爲幾時耶。得此解脫。其已久如。乃能如是。饒益。

衆生。其神答言。善男子。乃往古世。過如須彌山微塵
數劫。有劫名寂靜光。世界名出生妙寶。有五億佛於
中出現。彼世界中有四天下。名寶月燈光。有城名蓮
華光。王名善法度。以法施化。成就七寶。王四天下。王
有夫人。名法慧月。夜久眠寐。時彼城東有一大林。名
爲寂佳。林中有一大菩提樹。名一切光摩尼。王莊嚴
身。出生一切佛神力光明。爾時有佛。名一切法雷音
王。於此樹下成等正覺。放無量色廣大光明。徧照出
生妙寶世界。蓮華城內有王。夜神名爲淨月。詣王夫
人。法慧月所。動身瓔珞。以覺夫人而告之言。夫人當

知一切法。雷音王如來。於寂住林。成無上覺。及廣爲說諸佛功德。自在神力。普賢菩薩所有行願。令王夫人發阿耨多羅三藐三菩提意。供養彼佛。及諸菩薩。聲聞僧衆。善男子。時王夫人法慧月者。豈異人乎。我身是也。我於彼佛所發菩提心。種善根故。於須彌山微塵數劫。不生地獄餓鬼畜生諸惡趣中。亦不生於下賤之家。諸根具足。無有衆苦。於天人中。福德殊勝。不生惡世。恒不離佛。及諸菩薩。大善知識。常於其所。種植善根。經八十須彌山微塵數劫。常受安樂。而未滿足。菩薩諸根。

疏有六。初總顯本事因緣。二時彼城東下。明初佛興世。三蓮華城內下。善友勸發。四令王夫人下。正發大心。五時王夫人下。結會古今。六我於彼佛下。發心成益。

○二答得法久近

過此劫已。復過萬劫。於賢劫前。有劫名無憂徧照。世界名離垢妙光。其世界中淨穢相雜。有五百佛於中出現。其第一佛。名須彌幢寂靜妙眼。如來應正等覺。我爲名稱長者女。名妙慧光明。端正殊妙。彼淨月夜。神以願力。故於離垢世界。一四天下。妙幢王城中生。

作王夜神。名清淨眼。我於一時。在父母邊。夜久眠息。彼清淨眼來詣我所。震動我宅。放大光明。出現其身。讚佛功德。言妙眼如來坐菩提座。始成正覺。勸喻於我。及以父母并諸眷屬。令速見佛。自爲前導。引至佛所。廣興供養。我纔見佛。卽得三昧。名出生見佛調伏衆生三世智光明輪。獲此三昧。故能憶念須彌山微塵數劫。亦見其中諸佛出現。於彼佛所聽聞妙法。以聞法故。卽得此破一切衆生闇法光明解脫。得此解脫。已卽見其身徧往佛刹微塵數世界。亦見彼世界所有諸佛。又見自身在其佛所。亦見彼世界一切衆

生解其言音。識其根性。知其往昔曾爲善友之所攝受。隨其所樂而爲現身。令生歡喜。我時於彼所得解脫。念念增長。此心無間。又見自身徧往百佛刹微塵數世界。此心無間。又見自身徧往千佛刹微塵數世界。如是念念乃至不可說不可說佛刹微塵數世界。亦見彼世界中一切如來。亦自見身在彼佛所聽聞妙法。受持憶念觀察決了。亦知彼佛諸本事海。諸大願海。彼諸如來嚴淨佛刹。我亦嚴淨。亦見彼世界一切衆生。隨其所應而爲現身教化調伏。此解脫門念念

增長。如是乃至充滿法界。

〔疏〕於中二。初總顯得法因緣。後我纔見佛下。正明得法於中三。初得方便三昧。謂上見諸佛。下化衆生。次以聞法故下。得此解脫。後得此解脫已下。廣顯業用。

○第四謙推

善男子。我唯知此菩薩破一切衆生闇法光明解脫。如諸菩薩摩訶薩。成就普賢無邊行願。普入一切諸法界海。得諸菩薩金剛智幢自在三昧。出生大願住持佛種。於念念中成滿一切大功德海。嚴淨一切廣

大世界。以自在智。教化成熟一切衆生。以智慧日。滅除一切世間闇障。以勇猛智。覺悟一切衆生昏睡。以智慧月。決了一切衆生疑惑。以清淨音。斷除一切諸有執著。於一切法界。一一塵中。示現一切自在神力。智眼明淨。等見三世。而我何能知其妙行。說其功德。入其境界。示其自在。

疏可知

○第五指示後友

善男子。此閻浮提摩竭提國菩提場內。有主夜神。名普德淨光。我本從其發阿耨多羅三藐三菩提心。當

以妙法開悟於我。汝詣彼問。菩薩云何學菩薩行。修菩薩道。

〔疏〕云菩提場內者。得無誤犯。由契理故。理卽菩提場。友名普德者。最勝法界。無德不具故。淨光者。正智證入。離誤犯之垢故。卽前淨月。故云本從發心。

○第六戀德禮辭

爾時善財童子。向婆珊婆演底神而說頌曰

見汝清淨身 相好超世間 如文殊師利

亦如寶山王 汝法身清淨 三世悉平等

世界悉入中 成壞無所礙 我觀一切趣

千刹微塵劫	始得見聞汝	悉獲功德利	種種令清淨	一一毛孔內	各現無數身	十方諸佛所	清淨無分別	一一毛孔內	一一毛孔中	星月各分布
歎汝一毛德	亦應歡喜受	成就菩提道	若有諸衆生	示現無量刹	十方諸國土	普雨莊嚴具	一一毛孔內	悉放無數光	如空徧十方	諸佛悉入中
劫數猶可窮	以滅煩惱故	多劫在惡趣	聞名及見身	隨諸衆生欲	方便度衆生	一一毛孔內				

功德終無盡

〔疏〕於中二。先以偈讚。表戀德之深。於中十偈分四。初四讚身心超勝。次三明大用無涯。次二益物不虛。後一結德無盡。

時善財童子說此頌已。頂禮其足。繞無量匝。殷勤瞻仰。辭退而去。

〔疏〕二作禮辭退

〔論〕善財投身於地。禮夜神足。合掌申請所求法門。此之境界。身量毛孔。乃是法界之身。極其法界際境界也。令修行者。做而學之。十地方終。舉樣極全。

學者纔得其分也。乃是全中之分。故以智之境界。及時不遷。卽全約位升進。卽分。此是初歡喜地。善知識。以檀波羅密爲主。餘九爲伴。此明入俗同纏。長養大慈悲門。具足檀波羅密。令得圓滿。以修慈故。多生不離女身。表之。無出世相也。常處俗流。此十地中。總明處世。長養大慈悲門。十箇善知識。無出家相。總爲女天。說多生因本發菩提心時。亦是女身。以表十地。是入衆生界。長養大慈悲之行也。以表女是慈悲。能長養子孫。無疲勞故。用明菩薩養衆生故。

○第二普德淨光夜神。寄離垢地善友。義如前說。

鈔奇離垢地者。謂真淨尸羅離。於能起微細段犯煩惱垢故。文則具六。且分

爲四。第一依教趣求。第二見敬諮問。第三稱讚授法。第四戀德禮辭。今初

爾時善財童子。了知彼婆珊婆演底夜神初發菩提心。所生菩薩藏。所發菩薩願。所淨菩薩度。所入菩薩地。所修菩薩行。所行出離道。一切智光海。普救衆生心。普徧大悲雲。於一切佛刹。盡未來際。常能出生普賢行願。漸次遊行。至普德淨光夜神所。

〔疏〕先念前法。有十一句。初一念發心。餘十念得法。

○第二見敬諮問

頂禮其足。繞無數帀。於前合掌而作是言。聖者。我已先發阿耨多羅三藐三菩提心。而我未知菩薩云何修行菩薩地。云何出生菩薩地。云何成就菩薩地。

○第三稱讚授法。先讚後授。授中二。先長行。後偈頌。長行中三。第一正授法門。第二謙已推勝。第三指示後友。初中二。先總答所問。後別示已法。

今初

夜神答言。善哉善哉。善男子。汝已能發阿耨多羅三藐三菩提心。今復問於菩薩地。修行出生及以成就。

善男子。菩薩成就十法。能圓滿菩薩行。何者爲十。一者得清淨三昧。常見一切佛。二者得清淨眼。常觀一切佛相好莊嚴。三者知一切如來無量無邊功德大海。四者知等法界無量諸佛法光明海。五者知一切如來一一毛孔放等衆生數大光明海。利益無量一切衆生。六者見一切如來一一毛孔出一切寶色光明燄海。七者於念念中出現一切佛變化海。充滿世界。究竟一切諸佛境界調伏衆生。八者得佛音聲同一切衆生言音海。轉三世一切佛法輪。九者知一切佛無邊名號海。十者知一切佛調伏衆生不思議自

在力。善男子。菩薩成就此十種法。則能圓滿菩薩諸行。

〔疏〕有標徵釋結。釋中有十句。初總。餘別。別中三是

智法光明。四放光利益。五常光發燄。餘可知。別中

二是智法光明者。疏但隨難解三。今當重釋。畧有二意。一作總別解。初一總。餘九別。別中二觀。外相三念。內德。四知所證。五放光。六常光。七變化。八圓音。九名號。十調生。二約身釋。一菩提身。二相好身。三智身。四法身。五願身。如賢首品。毛孔放光。皆宿願故。六福德身。七化身。八力持身。圓音持法。盡未來故。九意生身。隨意立名。故十威勢身。結云。威力故。十身竝彰。內外皆具。若專念此。何行不成。

○二別示已法。於中二。先標名體。

善男子。我得菩薩解脫。名寂靜禪定樂。普遊步

〔疏〕謂契理無著爲寂靜。止觀雙運爲禪定。正法樂住爲樂。大用無涯爲普游步。

○後廣顯業用。於中四。初明攀緣如實禪。同如來

清淨禪。卽寂靜業用。次現法樂住禪。卽定業用

三明引生功德禪。四饒益有情禪。此二卽普游

步業用。今初。鈔初明攀緣如實禪同如來清淨禪等者楞伽第二。說有四禪。經云。

大慧。有四種禪。云何爲四。謂愚夫所行禪。觀察

義禪。攀緣如實禪。如來禪。云何愚夫所行禪。謂

有聲聞緣覺外道修行者。人無我自性。共相。骨

躠。無常。苦。不淨。相。計著爲首。如是不異。觀前後

轉進。想不除滅。是名思。夫所行禪。云何觀察義

禪。謂人無我自性。共相。外道。自他俱無。性已。觀

法無我。彼地相義。漸次增進。是名觀察義禪。云

何攀緣如實禪。謂妄想二無我。妄想如實處不

生妄想是名攀緣。如實禪云：何如來禪？謂入如來地，行自覺聖智相。三種樂住，成辦衆生，不思議事。是名如來禪。故偈云：凡夫所行禪，觀察相義禪。攀緣如實禪。如來清淨禪。釋曰：配位有二師。一云初几小，二至七地，三八地已上，四卽佛地。二大雲言亦初几小，二十信至廻向三，卽加行四，卽初地至佛地，以證如故。皆名如來。若修觀者，凡夫直用如來淨禪。今此文中，卽以第三同於第四，不用初二，初是几小，二猶未忘法無我故。卽以三四因果交徹，謂見佛法界，卽攀緣。如義無取，無入，卽同如來清淨禪。義又如來禪，不礙下文廣利樂故。

普見三世一切諸佛，亦見彼佛清淨國土道場衆會。神通名號說法壽命言音身相種種不同，悉皆明覩。而無取著，何以故？知諸如來非去世趣，永滅故。非來體性無生故，非生。法身平等故，非滅。無有生相故，非

實住如幻法故。非妄。利益衆生故。非遷。超過生死故。非壞。性常不變故。一相。言語悉離故。無相。性相本空故。

〔疏〕文中有標。徵釋。標以見佛無著故寂靜。釋云所以無著者。窮了如來之體性故。文有十非。大同中論八不。謂不去不來。不生不滅。爲四。其非實非妄。卽是不常。非遷非壞。卽是不斷。一相卽非異。無相亦非一。

○二明現法樂住禪

善男子。我如是了知一切如來時。於菩薩寂靜禪定。

樂普遊步解脫門。分明了達成就增長。思惟觀察堅固莊嚴。不起一切妄想分別。大悲救護一切衆生。一心不動修習初禪。息一切意業攝一切衆生。智力勇猛。喜心悅豫。修第二禪。思惟一切衆生自性。厭離生死。修第三禪。悉能息滅一切衆生衆苦熱惱。修第四禪。

〔疏〕先牒前起後後思惟下。正顯四禪。初禪中。思惟觀察。卽是尋伺。當對治支。堅固莊嚴。猶是尋伺之相。次不起一切妄想分別。卽所離障。然世禪但離欲惡不善。今一乘淡妙。故離一切妄想。次大悲救

護一切衆生。卽利益支。謂離自憂。念衆生憂。故生喜樂。後一心下。卽所依支。謂彼二依止。鈔後思惟正顯四

禪者。斯則以如來禪導於四禪。不同三地。寄位四禪。四禪不同。卽爲四別。然大小雖異。支林功德名數皆同。有十八支具。如三地地論。皆攝以爲四類。一所離障。二對治支。三利益支。四彼二依止。三昧四中。後三。是支。初一非支。並如前說。謂離自憂者。約五受說。初禪已離憂受。今大悲救護。卽憂衆生之憂。離憂合是所離。今念他憂。卻生喜樂。故爲利益。二禪中。息一切意業。卽滅覺觀。次攝一切衆生。是一心。智力勇猛。是內淨無覺無觀。次喜心悅豫。是定生喜樂。修第二禪。卽彼二依止。下三四禪準此。三禪中。初思惟一切衆生自性。卽捨念二支。謂捨離前攝生之喜。於此捨

中不失念。故厭離生處。卽慧樂。二支謂正知生處。不可喜故。厭離卽得真寂之樂。四禪中二句。通具三支。謂苦喜憂樂。皆是衆苦熱惱。於下苦中。橫生樂故。四受俱亡。故云悉能息滅。卽捨念清淨。旣無苦樂。卽是中受。

○三引生功德禪

增長圓滿一切智願。出生一切諸三昧海。入諸菩薩解脫海門。遊戲一切神通。成就一切變化。以清淨智普入法界。

〔疏〕遊戲神通。卽普游步義。上來皆約一乘。異於三

地寄法故。乃至云。普入法界。

○四明饒益有情禪。種種方便。無不饒益。亦普游

步義

善男子。我修此解脫時。以種種方便。成就衆生。所謂
於在家放逸衆生。令生不淨想。可厭想。疲勞想。逼迫
想。繫縛想。羅刹想。無常想。苦想。無我想。空想。無生想。
不自在想。老病死想。自於五欲不生樂著。亦勸衆生
不著欲樂。唯住法樂。出離於家。入於非家。若有衆生
住於空閒。我爲止息。諸惡音聲。於靜夜時。爲說深法。
與順行緣。開出家門。示正道路。爲作光明。除其闇障。

滅其怖畏。讚出家業。歎佛法僧及善知識具諸功德。亦歎親近善知識行。復次善男子。我修解脫時。令諸衆生不生非法貪。不起邪分別。不作諸罪業。若已作者。皆令止息。若未生善法。未修波羅蜜行。未求一切智。未起大慈悲。未造人天業。皆令其生。若已生者。令其增長。我與如是順道因緣。乃至令成一切智智。

〔疏〕文中三。初令修四念處等觀。次若有衆生下。明作道因緣。後復次下。令修四正斷。

○第二謙已推勝。第三去此不遠下。指示後友善男子。我唯得此菩薩寂靜禪定樂。普遊步解脫門。

如諸菩薩摩訶薩。具足普賢所有行願。了達一切無邊法界。常能增長一切善根。照見一切如來智力。住於一切如來境界。恒處生死心無障礙。疾能滿足一切智願。普能往詣一切世界。悉能觀見一切諸佛。徧能聽受一切佛法。能破一切衆生癡闇。能於生死大夜之中。出生一切智慧光明。而我云何能知能說。彼功德行。善男子。去此不遠。於菩提場右邊。有一夜神。名喜目。觀察衆生。汝詣彼問。菩薩云何學菩薩行。修菩薩道。

疏去此不遠者。回寄世間故。菩提場右者。依理發

光。義便易故。喜目觀察者。忍惡視物。故云喜目。發
聞持光。故云觀察。

○後偈頌

爾時普德淨光夜神。欲重宣此解脫義。爲善財童了
而說頌曰

若有信解心	盡見三世佛	彼人眼清淨
能入諸佛海	汝觀諸佛身	清淨相莊嚴
一念神通力	法界悉充滿	盧舍那如來
道場成正覺	一切法界中	轉於淨法輪
如來知法性	寂滅無有二	清淨相嚴身

種種解脫境	普現一切剎	佛昔修諸行	隨類皆令解	充徧於法界	令其煩惱滅	如來一毛孔	如來一毛孔	放不思議光	種種清淨色	一切剎塵等	普現一切剎	徧示諸世間
非我所能知	諸佛出世間	已曾攝受我	普雨廣大法	除滅衆生苦	如來一毛孔	如來一毛孔	普照諸羣生	念念徧法界	佛身常光明	一切無不見	佛身不思議	法界悉充滿
一切諸菩薩	量等衆生數	故得見如來	使發菩提意	佛演一妙音	出生無盡化							

入佛一毛孔 如是妙解脫 非我所能知

此近有夜神 名喜目觀察 汝應往詣彼

問修菩薩行

〔疏〕十三偈分三。初十偈頌正授法門。次二頌謙已推勝後一頌指示後友前中頌前十法。文小不次。初四如次頌前四法。五超頌第七。六頌第六。七卻頌第五。八頌第十。九頌第八。十頌第九。時善財童子頂禮其足。繞無數匝。殷勤瞻仰。辭退而去。

〔論〕法門名菩薩寂靜禪定樂普游步解脫門者。此

是戒波羅密。以法身為戒體。卽一切境界性自禪
故。法界性禪。卽智自徧周。以智徧周。所以普游步
故。常處生處。行大慈悲。長養自體大慈悲心。於法
性中具菩薩行。徧法界。故名菩薩寂靜禪定樂。普
游步解脫門。明處生處中菩提法樂。亦能具足菩
薩大慈悲。復能徧行普賢道故。此明自心菩提場
內菩薩大悲之行。名普德淨光夜神者。智悲徧周。
照衆生之長夜。故名爲淨光。其慈育俗。名之爲德。
其智不爲性。自大用徧周。名之爲神。如此禪。以菩
提體行大寂靜法界無礙大慈悲心。寂用徧故。約

其功用。要四禪之名。此是第二離垢地中善知識。以戒波羅密爲體。餘九爲伴。治菩提心處於生灰海。行於慈悲不自在障。令得自在故。此明和融菩提生灰二不自在。使令自在。此位中以菩提體觀三界無生滅性。是總相觀。

○第三喜日觀察衆生夜神。寄發光地。鈔寄發光地謂成就

勝定大法總持能發無邊妙慧光故。文具六段。第一依教趣求。

爾時善財童子。敬善知識。教行善知識語。作如是念。善知識者。難見難遇。見善知識。令心不散亂。見善知識。破障礙山。見善知識。入大悲海。救護衆生。見善知

識得智慧光普照法界。見善知識。悉能修行一切智道。見善知識。普能覩見十方佛海。見善知識。得見諸佛。轉於法輪。憶持不忘。作是念已。發意欲詣喜目觀。察衆生夜神所。時喜目神加善財童子。令知親近善知識。能生諸善根。增長成熟。所謂令知親近善知識。能修助道具。令知親近善知識。能起勇猛心。令知親近善知識。能作難壞業。令知親近善知識。能得難伏力。令知親近善知識。能入無邊方。令知親近善知識。能久遠修行。令知親近善知識。能辦無邊業。令知親近善知識。能行無量道。令知親近善知識。能得速疾。

力普詣諸刹。令知親近善知識。能不離本處。徧至十方。時善財童子。遽發是念。由親近善知識。能勇猛勤修一切智道。由親近善知識。能速疾出生諸大願海。由親近善知識。能爲一切衆生。盡未來劫。受無邊苦。由親近善知識。能被大精進甲。於一微塵中。說法聲徧法界。由親近善知識。能速往詣一切方海。由親近善知識。於一毛道。盡未來劫。修菩薩行。由親近善知識。於念念中行菩薩行。究竟安住一切智地。由親近善知識。能入三世一切如來自在神力。諸莊嚴道。由親近善知識。能常徧入諸法界門。由親近善知識。常

緣法界未曾動出。而能徧往十方國土。爾時善財童子發是念已。卽詣喜目觀察衆生夜神所。

〔疏〕趣求中二。初依前友教。念友成益。後作是念已下。趣求後友。得友加持。於中四。一欲趣後友。二時喜目神下。得友加持。謂加令知近友之益。三時善財童子遽發下。加所成益。謂依前能加而起念故。如次以此十句。對前十句。四爾時善財下。正明趣後。

○第二見敬諮問

見彼夜神。在於如來衆會道場。坐蓮華藏師子之座。

疏見敬諮問中。但畧明見已含敬請。

○第三示已法界。謂懸爲示相。義當答問於中三。初標名體。次顯業用。後出所因。今初。

入大勢力普喜幢解脫。

疏無不攝伏爲大勢力。徧稱羣機。故云普喜摧伏高顯。所以名幢。

○第二明業用於中三。初顯無涯之用。次爾時善財見聞下。覩用獲益。後爾時善財得此下。慶益稱讚。初中謂毛孔身雲無有盡故。於中二。先出通說修行身。後復於一一諸毛孔下。出演說本。

行身。前中三。初總標。亦是釋名。

於其身上。一一毛孔。出無量種變化身雲。隨其所應。以妙言音。而爲說法。普攝無量一切衆生。皆令歡喜。而得利益。

○次別顯十度

所謂出無量化身雲。充滿十方一切世界。說諸菩薩行。檀波羅蜜。於一切事皆無戀著。於一切衆生。普皆施與。其心平等。無有輕慢。內外悉施。難捨能捨。出等衆生。數無量化身雲。充滿法界。普現一切衆生之前。說持淨戒。無有缺犯。修諸苦行。皆悉具足。於諸

世間無有所依。於諸境界無所愛著。說在生死輪迴
往返。說諸人天盛衰苦樂。說諸境界皆是不淨。說一
切法皆是無常。說一切行悉苦無味。令諸世間捨離
顛倒。住諸佛境。持如來戒。如是演說種種戒行。戒香
普熏。令諸衆生悉得成熟。

又出等衆生數種種身雲。說能忍受一切衆苦。所謂
割截捶楚。訶罵欺辱。其心泰然不動不亂。於一切行
不卑不高。於諸衆生不起我慢。於諸法性安住忍受。
說菩提心無有窮盡。心無盡故智亦無盡。普斷一切
衆生煩惱。說諸衆生卑賤醜陋不具足身。令生厭離。

讚諸如來清淨妙色無上之身。令生欣樂。如是方便成熟衆生。

又出等衆生界種種身雲。隨諸衆生心之所樂。說勇猛精進。修一切智助道之法。勇猛精進。降伏魔冤。勇猛精進。發菩提心不動不退。勇猛精進。度一切衆生。出生死海。勇猛精進。除滅一切惡道諸難。勇猛精進。壞無智山。勇猛精進。供養一切諸佛如來。不生疲厭。勇猛精進。受持一切諸佛法輪。勇猛精進。壞散一切諸障礙山。勇猛精進。教化成熟一切衆生。勇猛精進。嚴淨一切諸佛國土。如是方便成熟衆生。

又出種種無量身雲。以種種方便。令諸衆生心生歡喜。捨離惡意。厭一切欲。爲說慚愧。令諸衆生藏護諸根。爲說無上清淨梵行。爲說欲界是魔境界。令生恐怖。爲現不樂世間欲樂。住於法樂。隨其次第。入諸禪定。諸三昧樂。令思惟觀察。除滅一切所有煩惱。又爲演說一切菩薩諸三昧海。神力變現自在遊戲。令諸衆生歡喜適悅。離諸憂怖。其心清淨。諸根猛利。愛重於法。修習增長。

又出等衆生界種種身雲。爲說往詣十方國土。供養諸佛。及以師長。具善知識。受持一切諸佛法輪精勤。

不懈。又爲演說稱讚一切諸如來海。觀察一切諸法門海。顯示一切諸法性相。開闡一切諸三昧門。開智慧境界。竭一切衆生疑海。示智慧金剛壞一切衆生見山。升智慧日輪。破一切衆生癡闇。皆令歡喜成一切智。

又出等衆生界種種身雲。普詣一切衆生之前。隨其所應。以種種言辭而爲說法。或說世間神通福力。或說三界皆是可怖。令其不作世間業行。離三界處。出見稠林。或爲稱讚一切智道。令其超越二乘之地。或爲演說不住生死不住涅槃。令其不著有爲無爲。或

爲演說住於天宮。乃至道場。令其欣樂發菩提意。如是方便教化衆生。皆令究竟得一切智。

又出一切世界微塵數身雲。普詣一切衆生之前。念念中。示普賢菩薩一切行願。念念中。示清淨大願。充滿法界。念念中。示嚴淨一切世界海。念念中。示供養一切如來海。念念中。示入一切法門海。念念中。示入一切世界海。微塵數世界海。念念中。示於一切刹。盡未來劫清淨修行一切智道。念念中。示入如來力。念念中。示入一切三世方便海。念念中。示往一切刹。現種種神通變化。念念中。示諸菩薩一切行願。令一切

衆生住一切智。如是所作恒無休息。

又出等一切衆生心數身雲。普詣一切衆生之前。說諸菩薩集一切智助道之法。無邊際力。求一切智。不破壞力。無窮盡力。修無上行。不退轉力。無間斷力。於生死法無染著力。能破一切諸魔衆力。遠離一切煩惱垢力。能破一切業障山力。住一切劫修大悲行。無疲倦力。震動一切諸佛國土。令一切衆生生歡喜力。能破一切諸外道力。普於世間轉法輪力。以如是等方便成熟。令諸衆生至一切智。

又出等一切衆生心數無量變化色身雲。普詣十方

無量世界隨衆生心。演說一切菩薩智行。所謂說入一切衆生界海智。說入一切衆生心海智。說入一切衆生根海智。說入一切衆生行海智。說度一切衆生未曾失時智。說出一切法界音聲智。說念念徧一切法界海智。說念念知一切世界海壞智。說念念知一切世界海成住莊嚴差別智。說念念自在親近供養一切如來聽受法輪智。示現如是智波羅蜜。令諸衆生皆大歡喜調暢適悅。其心清淨生決定解。求一切智無有退轉。

〔疏〕如次十度各有又出以爲揀別。其間淡旨。如理

思之

○後類通餘法

如說菩薩諸波羅蜜成熟衆生。如是宣說一切菩薩種種行法而爲利益

〔疏〕種種行法者。神通度生菩提分等

上出通說修行身竟

○二出演說本行身

復於一一諸毛孔中。出無量種衆生身雲。所謂出興色究竟天善現天善見天無熱天無煩天相似身雲。出少廣廣果福生無雲天相似身雲。出徧淨無量淨

少淨天相似身雲。出光音無量光少光天相似身雲。
出大梵梵輔梵衆天相似身雲。出自在天化樂天兜
率陀天須夜摩天忉利天及其姝女諸天子衆相似
身雲。出提頭賴吒乾闥婆王乾闥婆子乾闥婆女相
似身雲。出毗樓勒叉鳩槃荼王鳩槃荼子鳩槃荼女
相似身雲。出毗樓博叉龍王龍子龍女相似身雲。出
毗沙門夜叉王夜叉子夜叉女相似身雲。出大樹緊
那羅王善慧摩睺羅伽王大速疾力迦樓羅王羅睺
阿脩羅王閻羅法王。及其子其女相似身雲。出諸人
王及其子其女相似身雲。出聲聞獨覺及諸佛衆相

似身雲。出地神。水神。火神。風神。河神。海神。山神。樹神。乃至晝夜。主方神等相似身雲。周徧十方。充滿法界。於彼一切衆生之前。現種種聲。所謂風輪聲。水輪聲。火燄聲。海潮聲。地震聲。大山相擊聲。天城震動聲。摩尼相擊聲。天王聲。龍王聲。夜叉王聲。乾闥婆王聲。阿脩羅王聲。迦樓羅王聲。緊那羅王聲。摩睺羅伽王聲。人王聲。梵王聲。天女歌詠聲。諸天音樂聲。摩尼寶王聲。

疏本行身中四。一出能說之身。二於彼一切衆生下。明演法之聲。三以如是等聲下。顯所說之法。四

如是說時下。彰說之益。前二後一。可知。

以如是等種種音聲。說喜目觀察衆生夜神。從初發心所集功德。所謂承事一切諸善知識。親近諸佛。修行善法。行檀波羅蜜。難捨能捨。行尸波羅蜜。棄捨王位宮殿眷屬。出家學道。行羸提波羅蜜。能忍世間一切苦事。及以菩薩所修苦行。所持正法。皆悉堅固。其心不動。亦能忍受一切衆生於已身心惡作惡說。忍一切業。皆不失壞。忍一切法。生決定解。忍諸法性能諦思惟。行精進波羅蜜。起一切智。行成一切佛法。行禪波羅蜜。其禪波羅蜜。所有資具。所有修習。所有成。

就所有清淨。所有起三昧神通。所有入三昧海門。皆
悉顯示。行般若波羅蜜。其般若波羅蜜。所有資具。所
有清淨。大智慧日。大智慧雲。大智慧藏。大智慧門。皆
悉顯示。行方便波羅蜜。其方便波羅蜜。所有資具。所
有修行。所有體性。所有理趣。所有清淨。所有相應事。
皆悉顯示。行願波羅蜜。其願波羅蜜。所有體性。所有
成就。所有修習。所有相應事。皆悉顯示。行力波羅蜜。
其力波羅蜜。所有資具。所有因緣。所有理趣。所有演
說。所有相應事。皆悉顯示。行智波羅蜜。其智波羅蜜。
所有資具。所有體性。所有成就。所有清淨。所有處所。

所有增長。所有深入。所有光明。所有顯示。所有理趣。
所有相應事。所有簡擇。所有行相。所有相應法。所有
所攝法。所知法。所知業。所知刹。所知劫。所知世。所知
佛出現。所知佛。所知菩薩。所知菩薩心。菩薩位。菩薩
資具。菩薩發趣。菩薩迴向。菩薩大願。菩薩法輪。菩薩
簡擇法。菩薩法海。菩薩法門海。菩薩法旋流。菩薩法
理趣。如是等智波羅蜜相應境界。皆悉顯示。成熟衆
生。

又說此神從初發心所集功德相續次第。所習善根
相續次第。所修無量諸波羅蜜相續次第。死此生彼。

及其名號相續次第。親近善友。承事諸佛。受持正法。修菩薩行。入諸三昧。以三昧力。普見諸佛。普見諸刹。普知諸劫。深入法界。觀察衆生。入法界海。知諸衆生死此生彼。得淨天耳。聞一切聲。得淨天眼。見一切色。得他心智。知衆生心。得宿住智。知前際事。得無依無作神足智。通自在遊行徧十方刹。如是所有相續次第。得菩薩解脫。入菩薩解脫海。得菩薩自在。得菩薩勇猛。得菩薩遊步。住菩薩想。入菩薩道。如是一切所有功德。相續次第。皆悉演說。分別顯示。成熟衆生。

疏三所說法中。二先說本行十度行法。後又說下。

類通所餘行法。今初忍中。惡作屬身。惡說屬口。禪
中有六句。一名體。二資緣。三造修。四獲得。五治障。
六起用。下之五度句。雖多少。例此可知。般若中。日
約破闇。雲約演法。藏顯包含。方便中。體性通事理。
理趣謂意趣。後類通餘行中。具四菩薩行。思之。後
類通餘行具四菩薩行者。初菩提分法行。以從初
發心積集功德。皆助菩提。是菩提分。二入諸三昧
下。卽三昧行。三得淨天耳下。卽神通行。得菩薩解
脫下。成熟衆生行。結中云。分別顯示成熟衆生。
如是說時。於念念中十方各嚴淨。不可說不可說諸
佛國土。度脫無量惡趣衆生。令無量衆生。生天人中
富貴自在。令無量衆生。出生死海。令無量衆生。安住

聲聞辟支佛地。令無量衆生住如來地。

〔疏〕四彰說之益。 一出演說本行身竟

○二覩用獲益。卽證入法界

爾時善財童子。見聞如上所現一切諸希有事。念念觀察。思惟解了。深入安住。承佛威力及解脫力。則得菩薩不思議大勢力。普喜幢自在力。解脫何以故。與喜目夜神於往昔時同修行故。如來神力所加持故。不思議善根所祐助故。得菩薩諸根故。生如來種中。故得善友力所攝受故。受諸如來所護念故。毗盧遮那如來曾所化故。彼分善根已成熟故。堪修普賢菩

薩行故

〔疏〕於中三。初顯證因緣。次則得下。正明證入。後何
以下。徵釋所由

○三慶益稱讚

爾時善財童子得此解脫已。心生歡喜。合掌向喜目
觀察衆生夜神。以偈讚曰

無量無數劫 學佛甚深法 隨其所應化

顯現妙色身 了知諸衆生 沈迷嬰妄想

種種身皆現 隨應悉調伏 法身恒寂靜

清淨無二相 爲化衆生故 示現種種形

示現世間相	色身妙無比	種種業莊嚴	示現種種身	供養十方佛	一心住三昧	戲論所不動	而現種種身	調伏一切衆	於諸蘊界處
	清淨如普賢	爲說無礙法	普攝諸羣生	得佛方便力	無量劫不動	爲著妄想者	住於諸有界	不著内外法	未曾有所著
	隨諸衆生心	令其悉清淨	了知諸有海	念念無邊際	毛孔出化雲	弘宣十力法	遠離諸分別	已度生死海	示行及色身

〔疏〕十偈分四。初一偈現說之因。次一現說之意。次六現說體相。皆卽寂之用。後二總結現說無礙。

已上顯業用竟

○第三大科。明出所因。於中先興二問。後具二答。於中先以偈答。後會古今。前中總九十一頌。分二。前七十九頌。答發心久近。後十二頌。答得法時節。今初

爾時善財童子說此頌已。白言天神。汝發阿耨多羅三藐三菩提心。爲幾時耶。得此解脫。其已久如。爾時喜目觀察衆生。主夜神。以頌答曰

我念過去世 過於刹塵劫 刹號摩尼光

劫名寂靜音

〔疏〕初中有十復次。初寂靜音劫。正是發心之時。有三十一頌。分六初一偈總標。

百萬那由他 俱胝四天下 其王數亦爾

各各自臨馭 中有一王都 號曰香幢寶

莊嚴最殊妙 見者皆欣悅 中有轉輪王

其身甚微妙 三十二種相 隨好以莊嚴

蓮華中化生 金色光明身 騰空照遠近

普及閻浮界 其王有千子 勇猛身端王

臣佐滿一億 智慧善方便 嬪御有十億
顏容狀天女 利益調柔意 慈心給侍王
其王以法化 普及四天下 輪圍大地中
一切皆豐盛 我時爲寶女 具足梵音聲
身出金色光 照及千由旬

疏二有八偈。顯其本生

日光旣已沒 音樂咸寂然 大王及侍御
一切皆安寢 彼時德海佛 出興於世間
顯現神通力 充滿十方界 放大光明海
一切刹塵數 種種自在身 徧滿於十方

地震出妙音	普告佛興世	天人龍神衆
一切皆歡喜	一一毛孔中	出佛化身海
十方皆徧滿	隨應說妙法	我時於夢中
見佛諸神變	亦聞深妙法	心生大歡喜
一萬主夜神	共在空中住	讚歎佛興世
同時覺悟我	賢慧汝應起	佛已現汝國
劫海難值遇	見者得清淨	我時便寐寤
卽覩清淨光	觀此從何來	見佛樹王下
諸相莊嚴體	猶如寶山王	一切毛孔中
放大光明海		

疏三有十偈。明發心本事

見已心歡喜 便生此念言 願我得如佛

廣大神通力

疏四一偈。正顯發心

我時尋覺悟 大王并眷屬 令見佛光明

一切皆欣慶 我時與大王 騎從千萬億

衆生亦無量 俱行詣佛所 我於二萬歲

供養彼如來 七寶四天下 一切皆奉施

時彼如來說 功德普雲經 普應羣生心

莊嚴諸願海 夜神覺悟我 令我得利益

我願作是身 覺諸放逸者 我從此初發
最上菩提願 往來諸有中 其心無忘失

疏五六偈。明發後之德

從此後供養 十億那由佛 恒受人天樂

饒益諸羣生 初佛功德海 第二功德燈

第三妙寶幢 第四虛空智 第五蓮華藏

第六無礙慧 第七法月王 第八智燈輪

第九兩足尊 寶燄山燈王 第十調御師

三世華光音 如是等諸佛 我悉曾供養

然未得慧眼 入於解脫海

〔疏〕六有五偈。轉值餘佛。未得慧眼者。未得十解正
慧明故

從此次第有 一切寶光刹 其劫名天勝

五百佛興世 最初月光輪 第二名日燈

第三名光幢 第四寶須彌 第五名華燄

第六號燈海 第七熾然佛 第八天藏佛

九光明王幢 十普智光王 如是等諸佛

我悉曾供養 尚於諸法中 無而計爲有

〔疏〕二天勝劫中。有四偈半。無而計爲有者。未解卽
心自性故。餘之八劫。偈數可知。鈔未解卽心自性者。前劫未得十住

自分。此劫未
得十住勝進

從此復有劫 名曰梵光明 世界蓮華燈

莊嚴極殊妙 彼有無量佛 一一無量衆

我悉曾供養 尊重聽聞法 初寶須彌佛

二功德海佛 三法界音佛 四法震雷佛

五名法幢佛 六名地光佛 七名法力光

八名虛空覺 第九須彌光 第十功德雲

如是等如來 我悉曾供養 未能明了法

而入諸佛海

〔疏〕三梵光闡劫中。未能明了法者。未了十行眞實

行法故

次後復有劫 名爲功德月 爾時有世界

其名功德幢 彼中有諸佛 八十那由他

我皆以妙供 深心而敬奉 初乾闥婆王

二名大樹王 三功德須彌 第四寶眼佛

第五盧舍那 第六光莊嚴 第七法海佛

第八光勝佛 九名賢勝佛 第十法王佛

如是等諸佛 我悉曾供養 然未得深智

入於諸法海

疏四功德月劫未得善巧迴向深智趣佛智海故。

此後復有劫 名爲寂靜慧 刹號金剛寶

莊嚴悉殊妙 於中有千佛 次第而出興

衆生少煩惱 衆會悉清淨 初金剛齋佛

二無礙力佛 三名法界影 四號十方燈

第五名悲光 第六名戒海 第七忍燈輪

第八法輪光 九名光莊嚴 十名寂靜光

如是等諸佛 我悉曾供養 猶未能深悟

如空清淨法 遊行一切刹 於彼修諸行

疏五寂靜慧劫。未得地上二空真如清淨法故。

次第復有劫 名爲善出現 刹號香燈雲

淨穢所共成 億佛於中現 莊嚴刹及劫

所說種種法 我皆能憶持 初名廣稱佛

次名法海佛 三名自在王 四名功德雲

第五法勝佛 第六天冠佛 第七智燄佛

第八虛空音 第九兩足尊 名普生殊勝

第十無上士 眉間勝光明 如是一切佛

我悉曾供養 然猶未能淨 離諸障礙道

〔疏〕六善出現劫。未淨修道之障故

次第復有劫 名集堅固王 刹號寶幢王

一切善分布 有五百諸佛 於中而出現

我恭敬供養 求無礙解脫 最初功德輪

其次寂靜音 次名功德海 次名日光王

第五功德王 第六須彌相 次名法自在

次佛功德王 第九福須彌 第十光明王

如是等諸佛 我悉曾供養 所有清淨道

普入盡無餘 然於所入門 未能成就忍

〔疏〕七集堅固王劫。未得六地緣生淡順之忍。

次第復有劫 名爲妙勝王 刹號寂靜音

衆生煩惱薄 於中有佛現 八十那由他

我悉曾供養 修行最勝道 初佛名華聚

次佛名海藏 次名功德生 次號天王髻

第五摩尼藏 第六真金山 第七寶聚尊

第八法幢佛 第九名勝財 第十名智慧

此十為上首 供養無不盡

疏八妙勝主劫。修最勝道者。六地般若為勝道故。

鈔八妙勝劫下。無結說得之言。合言未得七地。而前劫但云修行最勝道。即是已得六地耳。

次第復有劫 名曰千功德 爾時有世界

號善化幢燈 六十億那由 諸佛興於世

最初寂靜幢 其次奢摩他 第三百燈王

第四寂靜光 第五雲密陰 第六日大明

七號法燈光 八名殊勝燄 九名天勝藏

十大名大吼音 如是等諸佛 我悉常供養

未得清淨忍 深入諸法海

〔疏〕九千功德劫未得八地淨無生忍故

次第復有劫 名無著莊嚴 爾時有世界

名曰無邊光 中有三十六 那由他佛現

初功德須彌 第二虛空心 第三具莊嚴

第四法雷音 第五法界聲 第六妙音雲

第七照十方 第八法海音 第九功德海

第十功德幢 如是等諸佛 我悉曾供養

疏十無著莊嚴劫。四頌半。但言供養者。下明得法
 故。又前次第。皆言未得後後。則已得前前。思之。亦
 可初劫已得初地。未得第二。乃至第九。未得第十
 地。第十劫中。方得圓滿。故其劫名。亦順地義。如文
 思之。鈔故其劫下。疏家復爲一釋。以初劫名寂靜
 音。已得初地。二天勝劫。天即淨義。亦順離垢。
 三梵光順發光。四功德月順發慧。月有光明發光
 發故。五寂靜慧順禪。增故。六善出現順善現故。七
 集堅固王功用滿故。已得方便。不可壞故。八勝妙
 劫順於不動無功用故。九千功德。法師位故。十無
 著莊嚴智慧無著。二嚴滿故。已上七十九頌。答發心久近竟

○第二答得法時節

次有佛出現 名爲功德幢 我爲月面天

供養人中王 時佛爲我說 無依妙法門

我聞專念持 出生諸願海 我得清淨眼

寂滅定總持 能於念念中 悉見諸佛海

我得大悲藏 普明方便眼 增長菩提心

成就如來力

〔疏〕時節中。卽前無著劫得此法也。於中二。初四偈得無功用之三地。謂八地無依大願。九地滅定總持。十地成如來力。

見衆生顛倒 執常樂我淨 愚癡闇所覆

妄想起煩惱 行止見稠林 往來貪欲海

集於諸惡趣 無量種種業 一切諸趣中

隨業而受身 生老死衆患 無量苦逼迫

爲彼衆生故 我發無上心 願得如十方

一切十力尊 緣佛及衆生 起於大願雲

〔疏〕後八結成普賢行。位於中三。初四偈半。牒舉大

心之始

從是修功德 趣入方便道 願雲悉彌覆

普入一切道 具足波羅蜜 充滿於法界

速入於諸地 三世方便海 一念修諸佛

一切無礙行

〔疏〕次二偈半。明成德之終。

佛子我爾時 得入普賢道 了知十法界

一切差別門

〔疏〕後一偈總結圓滿。因果圓融。初後該徹。故入普

賢道

○二結會古今

善男子。於汝意云何。彼時轉輪聖王各十方。主能紹隆佛種者。豈異人乎。文殊師利童子是也。爾時夜神覺悟我者。普賢菩薩之所化耳。我於爾時爲王寶女。蒙彼夜神覺悟於我。令我見佛。發阿耨多羅三藐三

菩提心。自從是來。經佛刹微塵數劫。不墮惡趣。常生人天。於一切處常見諸佛。乃至於妙燈功德幢佛所。得此大勢力普喜幢菩薩解脫。以此解脫。如是利益一切衆生。

○第四謙已推勝。並可知。第五指示後友。

善男子。我唯得此大勢力普喜幢解脫門。如諸菩薩摩訶薩。於念念中普詣一切諸如來所。疾能趣入一切智海。於念念中以發趣門入於一切諸大願海。於念念中以願海門盡未來劫念念出生一切諸行。一行中。出生一切刹微塵數身。一一身。普入一切法。

界門。一一法界門。一切佛刹中隨衆生心說諸妙行。一切刹。一一塵中。悉見無邊諸如來海。一一如來所。悉見徧法界諸佛神通。一一如來所。悉見往劫修菩薩行。一一如來所。受持守護所有法輪。一一如來所。悉見三世一切如來諸神變海。而我云何能知能說彼功德行。善男子。此衆會中。有一夜神。名普救衆生妙德。汝詣彼問。菩薩云何入菩薩行。淨菩薩道。

〔疏〕後友同在證位。故云於此會中。起精進行。爲普救衆生。智燄吉祥。稱爲妙德。

時善財童子頂禮其足。繞無數帔。殷勤瞻仰。辭退而

去

論從供養十億那由他佛已下。至了知十法界一切無差別。有六十五行頌。答善財在劫供養諸佛久近多少之數。於此供養分中。有十一段。一段有十佛名號。十一段佛名號。皆配十一地中。隨位升進。一地配十佛名號。十地配百佛名號。十一地配一佛名號。明後一攝前多故。明一地具十地行故。以十波羅密互叅成故。彼轉輪聖王名十方主。能紹隆佛種者。豈異人乎。文殊師利是爾時夜天神覺悟我者。普賢菩薩之所化也。其王寶女蒙彼夜

神所化者。卽此喜目夜神是。表法是依根本智法
身之理。起差別智。行大慈悲。不限時劫。以佛刹微
塵數以況之。經如是等劫量修行。得此大勢力。普
喜幢解脫者。明第三地。修三界別別對治四禪八
定得自在故。處世行慈悲。行忍行一分終故。始於
一切善惡衆生常歡喜不厭故。以此修行劫數。答
前善財所問發心久近故。明忍性徧周。一時總答。
又明智無前後故。經云禪波羅密所有資具者。明
施戒忍精進四念觀三十七道品等。是禪家資具。
亦以五停心觀十八事物空閒寂靜。是禪家資具。

亦以師弟法智之正教。是禪家資具。亦以十波羅密與四攝。四無量爲助顯法界體用自在。是禪家資具。此是第三發光地。善知識以忍波羅密爲主。餘九爲伴。治三界中。任禪染淨二障。令行大慈悲。使無礙故。如是染淨二習。一分微薄。始於善惡衆生。不生厭捨。得大勢力。普喜幢解脫門。前五位十地中。言說所陳。恐不能了。至此位中。善財求善知識。以名目處所。男女長者比丘比丘尼優婆塞優婆夷菩薩夜神等。名行相狀。託法及事以表之。使

令易解

大方廣佛華嚴經疏論纂要卷第一百之七

福城弟子李世美呂逢元陳太念楊興
 經陳良茂李一瑄魏一祿王一性陳一
 證卓興行萬壽庵比丘正悟一立法坤
 法真覺因慈光庵比丘尼等性傳惺一
 願一心一信一熙一遇一達心輝心覺
 照澄鳳坂庵尼一道希有實寶心惺心
 緣寂調一頓林一璋王保姐法名興緯
 張興纓張智明劉王姐法名一珠王興
 俊劉一祖陳一海林一機塗居弟葉秋
 妹林一枝胡興開張保翫一居弟葉秋
 華嚴經入法界品疏論纂要第一之
 七卷伏願眾等植法界之真因入華嚴
 之性海永滋法澤普利含生
 康熙二十二年八月日華藏室謹題